

आकाशवाणीखबरां

- आम आदमी पार्टी गी बड्डा झटका, पार्टी दे 3 राज्यसभा सांसदें जिंदे च राघव चड्डा, संदीप पाठक ते अशोक मित्तल शामिल न, उनें पार्टी छोड़ने दा ऐलान कीता।
- पच्छिम बंगाल च चुनावें दे दुए गेड़ आस्तै प्रचार तेजी कन्नै जारी, वरिष्ठ नेता मतदाताएं गी प्रेरित करने लेई बध्नी चढ़ियै रैलियां करा'रदे न।
- सुप्रीम कोर्ट नै पच्छिम बंगाल दी मतदाता सूची थमां नां हटाए जाने दे खिलाफ याचिका पर सुनवाई करने थमां इंकार करी दित्ता।
- भारत नै SAARC Currency Swap framework दे तैहत मालदीव्स आस्तै 3000 करोड़ रुपे दी पैहली किश्त कड़ुने दी मंजूरी देई दित्ती ऐ।
- सुप्रीम कोर्ट नै आखेआ ऐ जे कोई बी अदालत कुसै महिला, खास करियै नाबालिग गी ओहदी इच्छा दे खिलाफ गर्भ धारण करने लेई मजबूर नेई करी सकदी।
- ते आईपीएल क्रिकेट च अज्ज बैंगलुरु च रायल चैलेंजर्स बैंगलुरु दा मुकाबला गुजरात टाइटन्स कन्नै।

<><><><><><>

AAP-MPs Resign

आम आदमी दे 3 राज्यसभा सांसद जिंदे च राघव चड्डा, संदीप पाठक ते अशोक मित्तल शामिल न, उनें पार्टी छोड़ने दा ऐलान करी दित्ता ऐ। नमीं दिल्ली च मीडिया कन्नै गल्लबात करदे होई राघव चड्डा होरें आखेआ जे ओह होरनें आम आदमी पार्टी दे लोकसभा दे सांसदें कन्नै बीजेपी च शामिल होंगन। उनें आखेआ जे आम आदमी पार्टी दे राज्यसभा दे दो तिहाई सांसद बीजेपी कन्नै जुड़ंगन। चड्डा हुंदा आखना ऐ जे आम आदमी पार्टी जेड़ी रिश्त गी जड़ै थमां मुकाने दी सगंध खाइयै बनी दी ही, हुन ओह रिश्तखोर हथें च चली गेदी ऐ। राज्यसभा दे सांसदें दे इस्तीफा देने पर आप दे नेता संजय सिंह होरें आखेआ जे इन्नै पार्टी दे लोकें दे कन्नोकन्नी पंजाब दे लोकें कन्नै बी विश्वासघात कीता ऐ।

<><><><><><>

WB-Campaigning

पच्छिम बंगाल च इस म्हीने दी 29 तरीक गी विधानसभा चुनावें दी 142 सीटें लेई ते दुए खीरी चरण लेई चुनावें अभियान इसलै जारी ऐ। मुखै दे प्रधानमंत्री ते बीजेपी दे वरिष्ठ नेता नरेंद्रमोदी होरें अज्ज पनीहती च पार्टी दी इक रैली दा संबोधन कीता। उनें आखेआ जे पैहले चरण उत््िूं दे लोकें बध्नी चढ़ियै मतदान कीता, जेड़ा इस गल्लै गी दर्शादा ऐ जे लोक बदलाव चाहंदे न। श्री मोदी होरें अपने संबोधन च इब्बी आखेआ जे अगले म्हीने दी 4 तरीक गी चुनावें दे नतीजे आई जांगन जेदे मगरा पच्छिम बंगाल राज्य रिश्तखोरी, बेरोजगारी महिलाएं दा अपमान ते घुसपैठ थमां मुक्त होई जाग। इस रैली दे मगरा प्रधानमंत्री होर दक्खन 24 परगानास जिले दे बरूईपुर च इक होर रैली दा संबोधन करंगन।

Shah-BJP WP

बीजेपी दे वरिष्ठ नेता ते केंद्री गृह मंत्री अमित शाह होरें दावा कीता ऐ जे विधानसभा चुनां दे पैहले चरण दे मतदान दे मगरा उंदी पार्टी शानदार प्रदर्शन करने जारदी ऐं कोलकाता दे न्यू टाउन च इक प्रेस कांफ्रेंस दा संबोधन करदे होई शाह होरें आखेआ जे मतदान दे पैहले चरण च गै बीजेपी दी 152एं थमां 110 सीटां जित्ते दी मेद ऐ। उनें अपने संबोधन च पैहले चरण च गै 92 फीसदी मतदान होने करी लोकें गी मबारकबाद दिती।

<><><><><><>

Shukla-WB Turnout

पच्छिम बंगाल च विधानसभा चुनाएं दे पैहले चरण च 90 फीसदी थमां मते मतदान होने पर कांग्रेस दे सांसद राजीव शुक्ला होरें हैरानगी प्रगट कीती ते आखेआ जे लोकें दा चुनाएं च बधी चढ़ियै हिस्सा लैना, लोकतंत्र आस्तै सकारात्मक निशानी ऐ। मीडिया कन्नै गल्ल करदे होई शुक्ला होरें आखेआ जे सारी राजनैतिक पार्टियां अप्पर हक च गै बढ़ोबढ़ मतदान दी मेद करा'रदी ऐ पर चुनाएं दे परिणाम दे बाद गै एहू गल्ल साफ होग जे केहड़ी पार्टी गी सभनें शा मती सीटां मिलडन।

<><><><><><>

SC-SIR Petition Refund

सुप्रीम कोर्ट नै अज्ज पच्छिम बंगाल च विशेष गहन संशोधन दे मगरा मतदाता सूची दे राएं अपने नां हटाए जाने कन्नै असंतुष्ट लोकें राएं कीती गेदी रिट दे उप्पर बचार करने आस्तै इंकार करी दिता। हालांकि चला'रदे विधानसभा चुनाएं च ओहू चुनां अधिकारियें दे रूप च शामिल ना। भारत दे मुख् न्यायाधीश सूर्याकांत हुंदी अध्यक्षता आहली पीठै याचिकाकर्ताएं गी एसआईआर प्रतिक्रिया च मतदाता सूची दे खलाफ अपील सुनने आस्तै गठित अपीलीय न्यायधिकरणें कन्नै संपर्क करने आस्तै आखेआ।

<><><><><><>

SAARC Currency Swap

भारत नै सार्क मुद्रा अदला-बदली ढांचे दे तैहत मालदीव्स लेई 30 अरब रुपें दी पैहली निकासी गी मंजूरी देई दिती ऐ। मेल च भारती उच्चायोग नै आखेआ ऐ जे अक्तूबर 2024 च राष्ट्रपति मोहम्मद मोइजू हुंदे नमीं दिल्ली दे राजकीय दौरे दुरान भारती रिजर्व बैंक ते मालदीप सरकार बश्कार बनी दी पैहली सहमति दे तैहत फंड जारी कीते जारदे ना। उच्चायोग नै आखेआ जे इस सुविधा नै मालदीव दी माली स्थिरता बनाई रखने च महत्वपूर्ण भूमिका निभाई ऐ।

<><><><><><>

COAS-Hall of Fame

रक्षा प्रमुख जनरल उपेंद्र द्विवेदी होरें गी अज्ज यू.एस आर्मी वार कॉलेज दे इंटरनेशनल हाल ऑफ फेम च शामिल कीता गेआ ऐ। जनरल वी.के सिंह ते जनरल विक्रम सिंह हुंदे बाद द्विवेदी एहू सम्मान हासल करने आले त्रीये व्यक्ति बनी गे ना।

Panchayati Raj Day

अज्ज राश्ट्र पंचायती राज दिवस मना करदा ऐ। इस दिन पंचायती राज प्रणाली दी औपचारिक ढांचे दे रूपै च स्थापना कीती गई ही। इस दिन 73में संवैधानिक संशोधन अधिनियम 1992 दी स्थापना होई ही जेड़ा 1993 च लागू होआ हा। पंचायती राज संस्था मुख्यै दे जमीनी लोकतंत्र दी रीड ऐ ते ग्रामीण स्वशासन च एहदी ऐतिहासिक जड़ा बड़ी डूंगियां ना। केंद्र ते राज्य सरकारें थमां लेइयै ग्रामीण स्तर पर सत्ता मकामी प्रतिनिधियें गी दित्ती जंदी ऐ। ढाई लख पंचायतें ते 24 लख थमां मते चुने गेदे प्रतिनिधियें कन्नै स्थानीय शासन बवस्था समावेशी होई चुकी दी ऐ।

<><><><><><>

Shah-Greetings

केंद्री गृह मंत्री अमित शाह होरें ते केंद्री राज्य मंत्री एस.पी सिंह बाघल होरें राश्ट्री पंचायती राज दिवस दे मौके पर नागरिकें गी शुभकामनां दित्ती। इक्क सोशल मीडिया पोस्ट दे राएं शाह होरें आखेआ जे पंचायत प्रणाली भारत दे सभनें शा पराने लोकतांत्रिक परम्पराएं थमां इक्क ऐ ते लोकतंत्र दा इक मजबूत स्तम्भ ऐ। भगेल होरें इब्बी आखेआ जे विकसित भारत दा सुखना ग्राएं, करसानें, पंचायतें ते ग्रामीण भारत दे विकास दे बगैर पूरा नेई होई सकदा।

<><><><><><>

SC-Pregnancy

सुप्रीम कोर्ट नै फैसला सनाया ऐ जे कोई बी बदालत कुसै बी महिला खास करियै नाबालिग गी अपनी मर्जी खलाफ गर्भ रखने लेई मजबूर नेई करी सकदी ऐ। न्यामूर्ति बी.वी नागरत्ना ते न्यामूर्ति उज्जल भूजान हुंदी पीठे अज्ज 15 बरें दी इक कुड़ी गी 7 महीने शा मते दे गर्भ दी डाक्टरी रूपै कन्नै हटाने दी इजाजत दिंदे होई इस गल्लै पर जोर दित्ता ऐ जे महिला दी प्रजनन सरबन्धी खुदमुख्तयारी गी सभनें शा मती तरजीह दित्ती जानी लोड़चदी। अदालत आखेआ जे कुसै दे शरीर बारै फैसला लैने दा अधिकार, खासतौरा पर गर्भ दे मामलें च संविधान दी दफा 21 दे तैहत निजी आजादी दा अनन्युट हिस्सा ऐ। एहदे च आखेआ गेआ ऐ जे कुसै नाबालिग गी अनचाहे गर्भ गी जारी रखने लेई मजबूर करना ओदे संवैधानिक अधिकारें दी उल्लंघना होग। पीठ नै इस दलील गी बी खारिज करी दित्ता ऐ जे बच्चे गी गोद लैने लेई छोड़ी दित्ता जाई सकदा ऐ ते आखेआ जे इस चाल्ली दक तर्क गर्भवती नाबालिग दी इच्छा ते कल्याण पर हावी नेई होई सकदे।

<><><><><><>

Milk-Freight Train

खित्ते दी आपूर्ति शृंखला च इक ऐतिहासिक उपलब्धि दे तैहत अमूल दे बक्ख-बक्ख उत्पाद लेइयै गुजरात थमां इक बशेष ट्रेन जम्मू-कश्मीर पुज्जी गई ऐ। आकाशवाणी दे जम्मू संवाददाता दी रिपोर्ट मूजब बशेष कन्टेनरें कन्नै लैस इस ट्रेन नै बड़ी बड़ी मात्रा च दुध ते होर दुए डेयरी उत्पाद इत्थे पजाने दा कम्म तोड़ चाढ़ेआ ऐ। इस उपलब्धि गी मौसम दी मार झल्लने आले जम्मू-कश्मीर ज्नेह प्रदेश च खाने-पीने आली चीजें दी आपूर्ति दे लिहाज कन्नै इक बड़ी गेंह दे तौर पर दिक्खेआ जा'रदा

ऐ। मेद ऐ जे इस पैहलकदमी दे कन्नै सर्द साने आली श्रृंखला गी मजबूती मिलने दे कन्नोकन्नी जम्मू-कश्मीर च डेयरी उत्पादें दी बवस्थित आपूर्ति जकीनी बनग।

<><><><><><>

Blackout-Mockdrills

साम्बा ते पुंछ दे जिला प्रशासनें आसेआ सिविल डिफेंस दे सहयोग कन्नै खित्ते च एमरजेंसी सरबन्धी तैयारिएं च बाद्दे लेई अज्ज रातीं बत्तियां स्हालियै कीते जाने आले ब्लैकआउट माक ड्रिल्स दा अभ्यास कीता जाह्ग। जिला प्रशासन साम्बा आसेआ एमरजेंसी तैयारिएं आले हीले दे तौर पर अज्ज रातीं तकरीबन साड्डे 8 बजे कस्वे च 5एं मिंटें लेई ब्लैकआउट दा अभ्यास कीता जाह्ग जिसले के बन्ने आले जिले पुंछ च एहू अभ्यास रातीं 8 बजे कीता जाह्ग। साम्बा दिएं डिप्टी कमिशनर आयूषी सूदन होरें लोकें गी अपील कीती ऐ जे ओहू शांत रौह्ने ते इस अभ्यास दरान घाब्वरन नेई। तोआई, पुंछ दे डिप्टी कमिशनर अशोक कुमार शर्मा होरें बी लोकें गी अपील कीती ऐ जे ओहू घाब्वरन नेई।

<><><><><><>

IMD-Weather

भारती मौसम विभाग नै सोमवारें तोड़ी राजस्थान, यू.पी छत्तीसगढ़, मध्य प्रदेश ते विदर्भ च लूह चलने दे असार दस्से ना। विभाग मताबक इयै ज्नेई स्थिति दिल्ली, चंडीगढ़, हरियाणा, पंजाब ते बिहार च कल्लै तगर रौहने दे असार ना। मौसम विभाग दा आखना ऐ जे कोंकण, पच्छिम बंगाल, उडीसा, तमिलनाडू, आंध्र प्रदेश दा समुंद्री इलाका, कर्नाटक ते गुजरात दे बी समुंद्र कन्नै लगदे इलाके च इस दरान गर्मी ते गुम्म आह्ला मौसम रौह्ग।

<><><><><><>

PM Mann ki Baat

प्रधानमंत्री नरेन्द्र मोदी औंदी 26 April गी बड्डुलै 11 बजे आकाशवाणी पर अपने “मन की बात” कार्यक्रम राए देश-विदेश दे लोकें कन्नै अपने विचार सांझे करगन। हर महीने दे खीरी ऐतवार गी प्रसारत होने आहले इस कार्यक्रम दी एहू 130मीं किशत होग। कार्यक्रम दा प्रसारण आकाशवाणी ते दूरदर्शन दे समूलचे नैटवर्क- ए.आई.आर. न्यूज वेबसाईट ते न्यूज ऑन ए.आई.आर mobile app, डी.डी न्यूज- प्रधानमंत्री हुंदे दफ्तर ते सूचना ते प्रसारण मंत्रालय दे यू-ट्यूब चैनलें पर बी होग। हिंदी प्रसारण दे बाद एहदा डोगरी भाशा च अनुवाद प्रसारित कीता जाह्ग।

<><><><><><>

Jiya-Wushu Gold

जम्मू-कश्मीर दी युवा वुशु खडारी जिया मन्हास नै रूस च आयोजित मन्ने-परमन्ने दे मास्को वुशु स्टार्स 2026 प्रतियोगिता च सुन्ने दा तगमा जित्ती लैता ऐ। आकाशवाणी दे जम्मू संवाददाता नै खबर दिक्ती ऐ जे अंतरराष्ट्री मंच पर जिया दे शानदार प्रदर्शन कन्नै जम्मू-कश्मीर सने पूरे मुल्ले गी बडा मान हासल होआ ऐ। भारत दी नुमायंदगी करा'रदी जिया नै असाधारण तकनीक ते जज्बे दा प्रदर्शन करदे होई अपने प्रतिद्वंदिएं गी पछाड़ियै शीर्ष थाह हासल कीती ऐ। जिया दी जित्त कन्नै होरनें युवा खडारियें दा बी दिल बधोग ते ओहू खेड्डें दे खेत्तर च बेहतर प्रदर्शन करने लेई प्रेरित होइन।

IPL

बैंगलुरु दे एम. चिन्नास्वामी स्टेडियम च अज्ज रॉयल चैलैन्जर्स बैंगलूरु दा मुकाबला गुजरात टाइटन्स कन्नै होगा। एह मैच संजा साड्डे 7 बजे खेड्डेया जाहगा। आई.पी.एल क्रिकेट च कल रातीं चेन्नैई सुपर किंग्स नै मुम्बई दे वानखेडे स्टेडियम च खेड्डे गेदे मैच च मुम्बई इंडियन्स गी 103 रन्ज कन्नै हराया। जित्त आस्तै 208 रन्ज दे लक्ष्य दा पिच्छा करदे होई मुम्बई इंडियन्स 19 ओवर च छडे 104 रन्ज बनाइयै ऑलआउट होई गेई। एदे थवां पैहले-पैहले बल्लेबाजी करदे होई चेन्नैई सुपर किंग्स नै तय 20 ओवरें च 6 विकटें दे नुक्सान पर 207 दा बड्डा स्कोर बनाया। चेन्नैई सुपर किंग्स दी तरफा संजू Samson नै 54 गेंदे च शानदार ते नाबाद 101 रन्ज बनाए जिसले कि अकील हुसैनै नै छडे 17 रन्ज देइए 4 विकट लैते- तिलक वर्मा नै 29 गेंदे पर 37 रन्ज बनाए जिसले के ए.एम. ग़जनफर ते अश्वनी कुमार नै मुम्बई इंडियन्स आस्तै 2-2 विकट लैते। संजू Samson गी प्लेयर ऑफ द मैच चुनेया गया।